

S T E N O G R A M

**1. Hitne sjednice Skupštine Kantona Sarajevo, održane u utorak,
20.11.2018. godine sa početkom rada u 10,00 sati**

**Predsjedavajući I Hitnom sjednicom zastupnik Elmedin Konaković
(u daljem tekstu predsjedavajući):**

Poštovani zastupnici, poštovani gosti, gledaoci TVSA, sve vas srdačno pozdravljam i otvaram 1. Hitnu sjednicu Skupštine Kantona Sarajevo. HIMNA BIH.

Još jednom vas sve srdačno pozdravljam, kolegice i kolege zastupnike, članove Vlade, uvažene goste, kao i predstavnike medija koji prate rad današnje sjednice. Svima nama želim uspješan rad i ugodnu radnu atmosferu.

Prema evidenciji Službe, sjednici prisustvuje 27 zastupnika, što je dovoljan broj za punovažan rad i odlučivanje.

Izostanak sa ove sjednice opravdao je: Haris Pleho, a kašnjenje su najavili Sabahudin Delalić i Vedran Jakupović.

Skupština Kantona Sarajevo je na svojoj Konstituirajućoj sjednici održanoj dana 16.11.2018. godine utvrdila da postoji osnov za sazivanje Hitne sjednice Skupštine Kantona Sarajevo, te je utvrdila termin održavanja iste za dan 20.11.2018. godine u 10,00 sati.

Za raspravu se javio ili intervencije gđin Mahir Dević. Molim režiju da mu da mikrofon. Izvolite gđine Deviću.

Poslanik/zastupnik Mahir Dević:

zahvaljujem kolega Konakoviću. Evo prije svega želim toplo da poselamim i pozdravim sve gledaoce TVSA, da novoizabranim kolegicama i kolegama čestitam na osvojenom mandatu u Skupštini Kantona Sarajevo. Javio sam se za diskusiju vezano za poslovničku intervenciju a ona se tiče svih ovih procedura koje mi svjedočimo evo od konstituirajuće sjednice pa do danas.

Predsjedavajući Elmedin Konaković:

kolega Deviću moram vas prekinuti da vas upozorim i upoznam sa Poslovníkom. Kada kažete poslovnička intervencija, morate odmah reći na koji se dio Poslovníka odnosi, koji je član i koje je pravo iz tog člana povrijeđeno. Dajte Deviću riječ.

Poslanik/zastupnik Mahir Dević:

zahvaljujem kolega. Radi se naravno o kršenju člana 3, kršenju člana 66 stav 5 i kršenju člana 137 Poslovníka. Dat ću obrazloženje o čemu se konkretno radi. Ali moram naravno napraviti uvod da bih mogao poentirati ovo što želim da kažem. Naime, mi smo na prošloj sjednici prisustvovali Konstituirajućoj sjednici koja apsolutno nije završena jer Skupština Kantona Sarajevo nije konstituisana. Ono sve što podrazumijeva Skupština Kantona Sarajevo od domova naroda, izbora predsjedavajućeg, zamjenika, Kolegija, predsjednika klubova, stalnih radnih tijela. Mi od toga bukvalno nismo uradili ništa osim što smo izabrali Komisiju za izbor i imenovanje i to je jedan mali segment koji podrazumijeva konstituiranje sjednice Skupštine. Prema tome, postavlja se opravdano pitanje da li Skupština koja nije konstituisana, koja nema svoje organe može uopće raditi. Ja odgovorno tvrdim da ne može raditi jer tamo postoji u članu 2 stav 1, ili stav 2, kristalno jasno definisano kako se konstituiše Skupština Kantona Sarajevo. Naravno, to je propisano u članovima poslovníka od člana 7 pa do člana 2. čak i ono što smo uradili na samoj toj sjednici da smo izvršili intervenciju na dnevni red konstituirajuće sjednice i tu smo prekršili te članove Poslovníka. Ali evo da se vratim o čemu se radi. Na toj sjednici mi smo intervenisali na dnevni red u smislu da smo usvojili dva potpuno nelegalna zaključka koji se nisu mogli tretirati na toj sjednici Skupštine kantona. Jedan se oslanja na član 3, u kome se kaže da će Skupština ono što nije propisano Poslovníkom urediti zaključkom. Zaključak stupa na snagu danom donošenja, a u stavu 3 istog člana se vrlo jasno kaže da taj zaključak apsolutno ne smije biti u suprotnosti sa Poslovníkom, što je ovdje bio slučaj. Član

na koji smo se pozvali prilikom sazivanja ove Skupštine je član 65 i ovu smo sjednicu nazvali hitnom sjednicom, iako u Poslovniku apsolutno ne postoji termin hitna sjednica Skupštine kantona Sarajevo a posebno ne postoji predsjedavanje nekog od kolega zastupnika, osim u dva slučaja, a u ta dva slučaja je na konstituirajućoj sjednici kada to odbije predsjedavajući iz starog saziva njegov zamjenik, onda to radi neko od kolega, a drugi je slučaj kada to odbije namjerno predsjedavajući, a nemamo zamjenika, onda 1/3 zastupnika može tražiti da neko predsjedava sjednicom Skupštine kantona. Prema tome, ovi članovi su apsolutno zloupotrijebljeni i znači niz članova Poslovnika je povrijeđeno, Poslovnik o radu Skupštine kantona Sarajevo podrazumijeva nekoliko sjednica: radne sjednice, tematske sjednice, prigodne i godišnju sjednicu. Hitna sjednica kako ste je vi nazvali u Poslovniku ne postoji, postoji sjednica koja se saziva u nešto kraćem roku, i čiji je karakter sjednice hitni. Ne hitna sjednica, nego je njen karakter hitni, i takvu sjednicu saziva predsjedavajući a hitnost utvrđuje u članu 71 jasno kaže Kolegij. Mi nemamo Kolegija, mi nemamo predsjedavajućeg Skupštine kantona, mi nemamo zamjenika predsjedavajućeg Skupštine, mi nemamo radnih tijela, koja treba da raspravljaju o ovome o čemu mi danas govorimo. Naravno, mi smo potpuno svjesni i odgovorni da Budžet Kantona Sarajevo je vrlo važan dokument.

Predsjedavajući Elmedin Konaković:

kolega Deviću zadržite se na poslovničkoj intervenciji, ne na diskusiji, imat ćete priliku diskutovati.

Poslanik/zastupnik Mahir Dević:

nećete me naravno kolega zbuniti s tim upadima, ja se držim tačno članova koje radimo, već drugi put radim. Prema tome znači u članu 66, zamolit ću sekretara.

Predsjedavajući Elmedin Konaković:

pošto vas nisam zbunjivao vi ste imali 3 minute, iz respekta prema vama, jer ste se dobro pripremili i dobro ste izučili Poslovnik, tri minute traje poslovnička intervencija. Minut sam vam dao duže. Ne možete završiti. Tri minute traje poslovnička intervencija. Dakle saslušali smo poslovničku intervenciju. Sekretar će vam odgovor. Kolega Deviću niste dali poentu jer ste razvukli jer opširno govorite, jer niste govorili o suštini. Sekretara molim. Kolega Deviću udaljiti ću vas sa sjednice. Molim sekretara da odgovori a imam i ja potrebu da odgovorim. Hoćete li vi ili ja prvi?

Sekretar po ovlaštenju Almira Kulovac Šetkić:

ja samo nisam shvatila konkretno pitanje koje je upućeno sekretaru. Dakle općenito ste se referisali na to da su povrijeđene odredbe Poslovnika. Dakle tačno je da član 65 Poslovnika propisuje tačno u kojim uslovima se može sazvati hitna sjednica Skupštine i također se u članu 71. kaže da konačnu odluku o utvrđivanju hitnog karaktera sjednice Skupštine donosi Kolegij Skupštine. Mi sada nemamo rukovodstvo, nemamo Kolegij, ali Kolegij jeste uža Skupština. Prema tome, ukoliko Skupština donese da je, po meni, da postoji karakter hitnosti, ja mislim da to nije problem. Međutim, ja moram podsjetiti na nadležnosti sekretara Skupštine koje su propisane u članu 15. Poslovnika. Sekretar nije nadležan da daje tumačenje odredaba Poslovnika. Nadležnost stara se o osiguranju uslova za rad Skupštine Kolegija, stara se o ostvarivanju prava i dužnosti poslanika, učestvuje u u pripremanju sjednica itd. da vam to ne čitam. Ja ono što mogu reći kada se ovdje nekada ranije diskutovalo o poziciji sekretara da li sekretar treba da bude državni službenik ili ne treba, tada su zastupnici rekli jednu zanimljivu konstataciju, da je sekretar institucionalna pamet koja govori kako se u nekim sličnim situacijama ranije radilo u ovoj Skupštini. E ja vam sa tog aspekta mogu reći da smo mi u ranijim mandatima imali iste, identične situacije, i u mandatu 2014/2018 je bila identična situacija gdje je Skupština također, isto, odmah nakon konstituirajuće sjednice, kada nije bilo utvrđeno ni rukovodstvo, ni klubovi naroda, u istoj situaciji, na isti način donijela odluku,

odredila hitnu sjednicu Skupštine, sa vrlo sličnim dnevnim redom i mislim čak je i tada isto određena osoba zastupnik koji će voditi tu sjednicu Skupštine. Eto ja toliko hvala.

Predsjedavajući Elmedin Konaković:

sada ću vam ja to dodatno pojasniti. Kolegij ne postoji, nije formiran Kolegij jer CIK još uvijek nije donio odluku o formiranju domova naroda tako da se ni rukovodstvo Skupštine nije moglo konstituisati. Rukovodstvo Skupštine, što ne znači da Skupština nije konstituisana. Vi ste preuzimanjem svojih mandata i pogotovo vi koji ste se profesionalizirali, a vama smo rješenja danas potpisali, profesionalni zastupnici, ne možete to biti u nepostojećem tijelu. Dakle, konstiturajuća sjednica je prekinuta zbog nepostojanja uslova da se izaberu delegati za Dom naroda, oni će se tek stvoriti donošenjem odluke CIK-a i ta će se sjednica nastaviti. Ja sam bio taj koji je prošli put čitao zaključak, identičan samo u drugoj boji, drugog dresa, druge stranke, jer je taj karakter hitnosti i tada odredila Skupština Kantona Sarajevo jer smo po informacijama koje smo dobili od Vlade ozbiljno zabrinuti za funkcionisanje recimo prije svega akademske zajednice, koja ukoliko ne bude regularno ušla na trezor i na budžet ima velike probleme i zastoj u svom funkcionisanju. Iz poštovanja prema Vladi koja je pripremila adekvatno i na vrijeme Nacrt budžeta, poštujući Zakon o budžetu i njegove rokove, mi smo pokazali dobru volju, a podsjećam i vi ste, pokazali dobru volju i tako ste glasali i n Kolegiju, pardon možda niste glasali na Kolegiju. Tako smo svi glasali da se desi sjednica i vi prošli put. I ona se dešava u parlamentarnoj praksi i odgovorno tvrdim ne kršeći nikakve poslovničke procedure jer član 3 je upravo napisan zbog ovakvih stvari i kaže: sve što nije precizirano ili definisano Poslovnikom Skupština može odrediti svojim zaključkom. Više puta se u parlamentarnoj praksi ovog tijela dokazalo da mimo dnevnog reda neko predloži neki zaključak o kojem se Skupština izašnjavala i to također nije kršenje Poslovnika. Ukoliko ste krenuli da danas prekinete sjednicu koja život za građane znači, dakle donošenje ovog budžeta, ja sam to prošli put pohvalio kao jedan dobar i zdrav pristup svih političkih partija, artikulirate tako svoj zahtjev i možete ga javno saopštiti i nama i građanima i svima koji gledaju ovu sjednicu i čekaju da se nova osnovica primijeni, da se projekti dese. Ukoliko se plašite za sadržaj budžeta, pripremite se i dajte adekvatne odgovore. Ukoliko budete politizirali i pokušavali ovu sjednicu, udaljit ću vas iz sale i neću dozvoliti da se danas od ovoga pravi teatar. Pozivam vas da ova sjednica teče normalno, parlamentarno, da o njoj govorite sve što mislite jasno i glasno, ali da ne zloupotrebljavate govornicu. Na poslovničku intervenciju koju ste vi preferirali vrlo dobro se pripremvši po članovima Poslovnika niste u pravu. Ona je regularno sazvana i ona će imati svoj tok i epilog sa glasanjem za ili protiv Nacrta budžeta kako bi prema ministru finansija, premijeru, članovima Vlade, građanima i zastupnicima bili korektni i ispoštovali potrebu da se budžet u kontinuitetu donosi u zakonom predviđenim rokovima.

Riječ ima gđin Aljoša Čampara, zašto se javljate.

Poslanik/zastupnik Aljoša Čampara;

po istoj ovoj temi i ja bih molio stvarno da prestanete.

Predsjedavajući Elmedin Konaković:

ne možete se javljati po istoj temi, morate reći zašto se javljate, javljate se prije dnevnog reda, morate naučiti u ovoj sali govoriti kako Poslovnik propisuje a ne onako kako vi mislite da treba. Morate reći jel razlog vašeg javljanja poslovnička intervencija na koji se član odnosi, jel razlog vašeg javljanja eventualno diskusija na koju nemate pravo u ovoj fazi skupštinske rasprave, je li eventualno neki drugi poslovnički model, ako nije odmah ću prekinuti svima dalja javljanja i preći ću na usvajanje dnevnog reda. Gđine Čampara po kojoj se osnovi javljate?

Poslanik/zastupnik Aljoša Čampara:

javljam se povreda poslovnika. Zahvaljujem. Nadam se da mi nećete oduzimati ovo vrijeme ako iskoristim par sekunda.

Predsjedavajući Elmedin Konaković:

oduzimat ću vam sigurno vrijeme ako ne bude govorili na koji član Poslovnika se referirate.

Poslanik/zastupnik Aljoša Čampara:

sve prisutne zastupnike i da im čestitam na preuzimanju funkcija. Da pozdravim premijera, cijenjenu Vladu, uvažene goste, medije i naše gledatelje. Mislim bez ikakve namjere da izazivam bilo kakvu polemiku ili neke jeftine političke poene, želim samo da naglasim nekoliko stvari vezano za povredu samog Poslovnika. Mislim da kod samog preuzimanja ovih funkcija jako je bitn da mi novoizabrani zastupnici poštujemo Ustav, Zakone ove zemlje, a prije svega i Poslovnik, kao izvor prava, isto kao što je Ustav i Zakon ove zemlje. Naravno ustav i Zakon nisu mogli razraditi sve procedure vezano za rad Skupštine Kantona Sarajevo, upravo iz toga razloga imamo i sam Poslovnik. Znamo hronologiju dešavanja kako je došlo do ove same sjednice. Mi smo na prošloj sjednici imali sjednicu koja je trebala biti prije svega svečarskog karaktera i gdje ćemo položiti zakletvu i po polaganju zakletve preuzimamo mandate. Sjetit ćete se da je prije polaganja zakletve i preuzimanja mandata na toj sjednici da je bila inicijativa od strane jednog ili dvojice poslanika koji nisu preuzeli mandat u datom momentu i milim da je to prva bila povreda Poslovnika. Jer poslanik/zastupnik dok ne preuzme mandat dok ne potpiše, dok ne položi svečanu izjavu dok je ne potpiše i preda u službe, jednostavno ne može biti u funkciji poslanika, odnosno zastupnika. Ja želim ovdje da kažem i da se pozovem na član 66 kao što je kolega Mahir Dević rekao u članu 66 propisano šta su radne sjednice Skupštine i radi čega se one održavaju- u radne sjednice Skupštine pod stavom 1,2,3,4, i 5 stoji rasprava o Nacrtu budžeta kantona za narednu godinu. Dakle, tačno eksplicitno navedeno. E sada ja vas pitam gospodo, pošto mi nemamo ovdje konstituisanu Skupštinu u punom kapacitetu kako ćemo mi izaći iz ove situacije? Gdje su radna tijela, gdje je komisija Zakonodavno pravna, gdje je Komisija za finansije i budžet? Kako će oni dati svoje prijedloge, mišljenje oko ovoga nacrta budžeta? Kako ćemo mi to ovdje u pisanom izvještaju imati? A da ne spominjemo ove druge članove koji govore o tome da treba...

Predsjedavajući:

tri minute gđine Čampara, iscrpili ste vrijeme za poslovničku intervenciju. Gđine Čampara, ne čuje vas niko osim vaših kolega s lijeve i desne strane. Nećete vi na ovakav način ovdje raditi. Vi ste taj koji ste rekli da poštujemo Ustav, Zakon, Poslovnik. Poslovnik kaže da za poslovničku intervenciju imate 3 minute. 3 minute su vam istekle i nekoliko sekundi preko toga. A opet vas nisam prekinuo jer ste ponovo naširoko pričali jer smo tek ušli pa malo puštamo zastupnike da malo uđu u formu, a inače bih vas prekinuo jer ste ponovo bili daleko od teme. Javila se gđa Bibija Kerla. Molim vas Kerla riječ.

Poslanik/zastupnik Bibija Kerla:

dobar dan svima. Pozdravljam zastupnike, pozdravljam gledaoce pored TV ekrana, pozdravljam normalno i dosadašnje ministre. Čestitam svima na izabranoj dužnosti. Ja bih prije svega da kažem da onih 300.000 u Kanton Sarajevo odlično su dočekali ovu sjednicu.

Predsjedavajući Elmedin Konaković:

zamolit ću i vas zastupnice Kerla samo da se referirate eventualno po kom osnovu se javljate.

Poslanik/zastupnik Bibija Kerla:

javljam se upravo po osnovu poslovničke intervencije- mi smo na zadnjoj sjednici Skupštine kantona, ustvari na Konstituirajućoj sjednici Skupštine donijeli zaključak da mi danas održimo sjednicu u povodu budžeta. Ja molim onoga ko predsjedava skupštinom da krene sa time a da sve ostalo idemo tačku po tačku, sjednicu po sjednicu. Hvala lijepa.

Predsjedavajući Elmedin Konaković.

Vrlo konstruktivan prijedlog. Hvala zastupnice Kerla. Još zastupnik Mirza Čelik i prelazimo na izjašnjavanje o dnevnom redu. Gdine Čelik izvolite.

Poslanik/zastupnik Mirza Čelik:

zahvaljujem predsjedavajući. Pa prije svega smatram da zaista evo i kolege su kazale prije mene dosta toga, ali šta ako se desi ako nemamo klubova naroda i ako se neko požali za vitalni nacionalni interes, vitalni interes klubova a mi nemamo konstituisane klubove naroda? Mišljenja sam i to se dešavalo u prethodnom mandatu da neko od zastupnika podnese vitalni nac interes donese to na klub i o tome se razmatra. Ovdje danas i ne znamo ko čini klubove po određenim pripadnostima, odnosno ti klubovi se nisu konstituisali. S tim u vezi, niko neće kazati da ovaj budžet treba zaustaviti niti da treba ovaj budžet danas stopirati ali vas molimo da kao predsjedavajućeg danas napravite ono što je u skladu s poslovníkom. A to je sljedeća procedura i kada smo imenovali i razrješavali Vladu i imenovali novog mandataru, radili smo to na način da su se svi u skupštinskoj sali složili da se trebamo držati Poslovníka. Poslovník je to odredio da to bude 12 dana dostava materijala i da se sazove sjednica. Niko ne spori od nas da javna rasprava treba kraće da traje za ovaj nacrt budžeta i da se budžet usvoji u ovoj tekućoj godini za narednu godinu. Stoga ja bih vas molio da zakažete ako mi već možemo zakazati Kolegij ili neki drugi organ i da zakažemo redovnu sjednicu Skupštine kantona gdje ćemo razmatrati nacrt budžeta, gdje ćemo ostaviti mogućnost javne rasprave pet dana, zadužiti Vladu da tu javnu raspravu sublimira i dostavi kao prijedlog budžeta i da u ovoj godini znamo šta znači za građane Kantona Sarajevo neusvajanje budžeta u ovoj kalendarskoj godini. Radit ćemo do 31.12. bez obzira ko bio i u poziciji i opoziciji da se budžet usvoji. Budžet se mora u ovoj tekućoj godini usvoji za narednu godinu. Stoga ja vas pozivam da ne kršimo odredbe Poslovníka, da radimo u duhu kako je to naloženo poslovníkom, a to su redovne procedure i da nema potrebe za nekim hitnim procedurama niti bilo koje druge osnove. Ja ne vidim nikakvu ovdje mogućnost da je ugrožena imovina, elementarne nepogode ili bilo što drugo što je Poslovníkom definisano. I naravno evo mogu samo kazati ukoliko dođe do izjašnjavanja o dnevnom redu Klub zastupnika SDA se neće izjasniti jer smatramo da ovo nije na legalan način ni zakazano. Hvala.

Predsjedavajući:

e ja vam se svima sada zahvaljujemo. I vas sam pustio bez da ste se referirali na Poslovník i nije bila poslovnička intervencija a samo po tom osnovu možete dobiti riječ u ovoj fazi skupštinske rasprave. Iz neke kolegijalnosti i iz želje da današnja sjednica prođe zaista u najboljem mogućem redu. Podsjetit ću vas hronološki, identična situacija u sazivu 2014/2018 u kojoj sam bio inicijator održavanja takvog sastanaka a zajedno smo zaključkom ovlastili Kemala Ademovića da rukovodi tom skupštinom, koja se desila imala svoj pravosnažnu, punopravnu valjanu važnost i sve su odluke bile naravno legalne. Drugu stvar koju možete odraditi, imate proceduru na koju se možete obratiti nadležnim organima i eventualno se žaliti pa čak i apelacije ukoliko to smatrate potrebnim, bilo kom organu također možete uraditi. Podsjećam vas da ste na zadnjoj sjednici konstituirajućoj kompletan klub glasali za održavanje ove sjednice a danas to derogirate ovim vašim stavovima o nepoštivanju poslovníka. I u suštini da ne zašiljimo previše tu priču, vi samo malo drugačije interpretirate Poslovník od nas, koji ga, dozvolite, znamo jako dobro, i pogotovo poznajemo te procedure,

proizašle iz Poslovnika. Tako da ovog trenutka zaključujem bilo kakvu raspravu po ovom pitanju dalje, jer nemate nikakav osnov da vam dam riječ, nikakve replike nemate pravo u ovoj fazi, imali ste intervencije, završili ste, pustio sam i pozivam Skupštinu Kantona Sarajevo da se izjasni o dnevnom redu današnje sjednice.

Na osnovu naprijed navedenog, Prijedlog dnevnog reda današnje, 1. Hitne sjednice, glasi:

1. Nacrt Budžeta Kantona Sarajevo za 2019.godinu,
2. Nacrt Zakona o izvršavanju Budžeta Kantona Sarajevo za 2019.godinu.

Molim zastupnike da se izjasne o Predloženom dnevnom redu. Glasajte. Molim rezultate glasanja.

Za je glasalo 20 zastupnika, PROTIV 0 i SUZDRŽANO 0. NIJE GLASALO 11 ZASTUPNIKA.

TAKO DA KONSTATUJEM DA JE DNEVNI RED DANAŠNJE SJEDNICE USVOJEN.

I da pročitam, nisam štela još sa ovim procedurama.

AD - 1.

NACRT BUDŽETA KANTONA SARAJEVO ZA 2019.GODINU

Molim Predlagača prve tačke dnevnog reda da napravi uvod. Nacrt Budžeta ste dobili uz poziv za sjednicu. Premijeru vi ili ministar finansija. Hoće li biti prezentacija ili ćete to samo usmeno. Izvolite premijer Vlade Kantona Sarajevo Adem Zolj.

Premijer Adem Zolj:

dobar dan, kako ste. Simpatično mi je zašto što bivši premijer Kantona kaže premijer Vlade. Znači prošao mandat nije naučio naziv mjesta koje je obavljao. Al dobro, hajd', naučit će.

Predsjedavajući :

izvinjavam se gđine Zolj, ako sam vas na bilo koji način tom titulom povrijedio.

Premijer Adem Zolj:

predsjednik Vlade, premijer je Kantona.

Predsjedavajući Hitnom sjednicom:

predsjedniče Vlade ja vam se izvinjavam, zaista se u pravu.

Premijer Adem Zolj:

moja prijateljska sugestija naravno jel. Gospodo draga ja vas pozdravljam.

Predsjedavajući Hitnom sjednicom:

i nisam ja bivši premijer ja sam bivši predsjednik Vlade.

Premijer Adem Zolj:

bivši premijer Kantona. Hajd' naučit ćete bit će vremena, mladi ste, naučit ćete vi. Učite vi od kada ali evo. Ovako, gospodo draga ja sam stvarno prošli put ovdje prisustvovao malo sam zakasnio pa sam prisustvovao himni ovdje i stajao mirno, vani tu, ispred, baš mirno, čuo se mali žamor ovdje, nije mi bilo baš jasno, na himnu uvijek je bila tišina. Ali je bio žamor ovdje. Ali kasnije sam shvatio šta je bilo itd. Bilo smijeha i svega ostalog. Eh, ovako da vam kažem, da se vratimo na ovo, jučer sam čuo jednu veliku misao, kaže: žuri nam se ali nemojte

da načinimo pogrešne korake. U potpunosti potpisujem to. Eh, da ne bi smo načinili pogrešne korake, ja kao premijer Kantona znači povlačim ove dvije tačke sa dnevnog reda. Hvala vam lijepo.

Predsjedavajući :

pauza pet minuta, šefovi klubova na konsultacije. Predstavnici klubova za konsultacije. Mi imamo šefa kluba ne znam zašto vi to niste uradili. Konsultacije u kabinetu trenutno predsjedavajućeg Skupštine Kantona Sarajevo.

NASTAVAK NAKON PAUZE

Predsjedavajući:

Pauza je bila pet minuta, nećemo dužiti, TVSA brzo ide nastavak. Ako neko je u kontaktu sa SDA klubom možda da im javi da počinjemo, jer je pauza 5 nije 15.

Dobro, nastavljamo 1. Hitnu sjednicu i konstatujem sljedeće, potpuno je legalno da predsjednik Vlade, premijer Adem Zolj povuče tačku dnevnog reda u skladu s Poslovníkom i to realno. Zaista izražavam svoje žaljenje jer ulazimo u veliki problem finansiranja, prije svega akademske zajednice, isplate plata po osnovu novih osnovica koje je ova Vlada potpisala kao i svih drugih projekata koji očigledno i pored dobre volje većine u Skupštini Kantona Sarajevo, ne skupštinske većine, nego većine zastupnika, zbog povlačenja ovog materijala neće biti finansirane i vjerovatno ćemo biti u situaciji da idemo u privremeno finansiranje. Imao sam potrebu još jednom samo da kažem da nikakvih povreda Poslovnika nije bilo, da je ovo procedura zbog karaktera hitnosti donošenja budžeta uobičajena u parlamentarnim skupštinama, pa i ovoj u kojoj se to već dešavalo i nikakvih pravni razloga za povlačenje nije bilo. Razlozi su skupštinskog karaktera, budžet ćemo komentarisati vjerovatno putem medija i otkrit ćemo prave razloge prekidanja ove sjednice. Tako da vas zastupnike obavještavam da smo iscrpili dnevni red, i da je današnja, 1. Hitna sjednica završena.